



21. august 2020

UKA 2020/49

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Aningaasalersorneqarsimasunik aallakaatitassianik nutaarsiassanik, maannarpiarlu soqutigintunik imallit tusagassiutit aallakaatitsisinnaangornissaat anguniarlugu inatsimmut atuuttumut allannguutissatut siunnersuuteqarnissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Aallakaatitassianik nutaarsiassanik, maannarpiarlu soqutigintunik imallit aningaasalersorneqarsimanerat, aningaasaliinermut tunngaviusimasoq suungaluarpalluunniit, aallakaatitsinnginnermi tunisisup kinaassusaanik takutitsisumik nalunaarutigineqartarnissaa piumasaqaataassaaq.

(Demokraatit Inatsisartuni gruppiat)

Tunngavilersuut:

Imaanngisaannassaaq aningaasaliisimasup radiukkut tv-kkulluunniit aallakaatitassap imarisaanut sunniuteqartassasoq. Innuttaasut tamat tatigisinnaasariaqarpaat aallakaatinneqartup imarisai niuernerpalaartunik soqutigisalinnik sunnerneqarsimanngitsuunissaat.

Tusagassiuttip uppernassutsini annaassavaa tusagasiutit aningaasaliisumit aqunneqarsimalluni paasisaaguni, imaluunniit allatut politikikkut imaluunniit niuernerpalaartunik soqutigisalinnik sunnerneqarsimaguni. Paasisimasara malillugu nunatsinni tusagassiutit tamanna annertuumik eqqumaffigaat.

Radiuliorneq tv-liornerlu akisupput, taamaammallu radioqarfiit tv-qarfiillu amerlanersaat niuernerpalaartunik soqutigisalinnik aningaasalersorneqarsimasarput. Iseritat assigiinngitsuusinnaapput. Aallakaatisassat akornganni ussasaarinnikkut imaluunniit aallakaatitassanik akorngusiinikkut ingerlasinnaasarpup. Aamma aallakaatitassiamut aningaasaliisoqarsinnaavoq, taamaalinikkullu aallakaatitassap aallartinninngerani imaluunniit naanerani aningaasaliisimasoq taaneqartarluni.

Tv-qarfiup uppernassusaa amerlanertigut apeqquserneqartanngilaq aningaasalersorneqarluni allakaatitassiortaraluarpat. Tassunga uppernarluartut assersuutit taaneqarsinnaapput aningaasalersorneqarlutik nutaarsiassalerisut, soorlu TV2 News, CNN-lu.

Nunatsinni qanittumi sammisaq iluarpallaanngitsoq nalaapparpup paasineqarmat KNR inatsisinik unioqquutitsisimasoq USA-mut tusagassiortutik angalanermi amerikarmiut nunanut allanut ministeriaqarfianit angalanissamut, unnuinermullu aningaasartuutissanut aningaasanik tunitissimammat. Tamanna pivoq tusagassiortut KNR-mi tusagassiornissamut kiffanngissuserqaraluartut. Ajoraluartumillu inernerata tassaasimavoq innuttatta USA-mut tunngasunik aammalu kalaallit USA-mi najugalinnut tunngasunik aallakaatitassanik pissanganarsimasinnaasunik annaasaqarmata. Tamanna isumaga malillugu uggornaraluaqaaq.



Assigisaannillu KNR-ip aasakut 2019-imi Tasiilamut tusagassiorlutik angalasimanermi aallakaatissaq peertariaqarsimavaat ilaatigut Kommuneqarfik Sermersuumit aningaasalersorneqarsimammat. Tamassuma kingunerismavaa innuttaasut aammaarlutik aallakaatitassamik pissanganarsimasinnaasumik innuttanullu paasititsiniaanertalimmik annaasaqarsimasut.

Taamatut oqareerlunga erseqqissartariaqarpara inatsisit inatsisaammata, tamatigullu malinneqartussaallutik. Taamaammallu eqqorlunilu eqqungilaq nalilerneqarmat matumuuna sammisami KNR inatsisinik unioqutitsisimammat.

Tamaammallu Demokraatit isumaqarput inatsit allanngortittariaqaripput, taamaalilluni siunissami aallakaatitassianik nutaarsiassanik, maannarpiarlu soqutiginartunik imallit aningaasalersorneqartalersinnaanissaat akuerisaalertissallugu. Tamanna KNR-mut aallakaatitsisartussanullu allanut aallakaatitassanik pitsaasunik tamatsinnullu iluaqutaasussanik aallakaatitsisarnissaannut aqquutissiuussisaaq.

Inatsimmi atuuttumi ullumikkut sillimaffigineqareerpoq aallakaatitassap imarisaa tapiissuteqartumit sunniuteqarfigineqartassanngimmat. Paragraf 48-mi, imm. 3-mi imatut allaqqasoqarpoq:

”Aallakaatitap aningaasalersorneqartup imarisaa qanorlu saqqummiunneqarnera tapiissuteqartumit imatut sunniuteqarfigineqassanngilaq, radioqarfiup tv-qarfiulluunniit aallakaatitanut tunngatillugu aqqqissuinermini nammineersinnaaneranut malunniutissalluni.”¹

Tamatumuunalu Demokraatit isumaqarput illersorneqarsinnaasoq paragraf 48, imm. 6 atorunnaartinneqassappat,² taamaalinnikkut aallakaatitassianik aningaasalersorneqarsimasunik

1. Radiukkut tv-kkullu aallakaatitsisarneq pillugu Inatsisartut Inatsisaat nr. 7, 8. juni 2014-imeersoq

2. § 48. Aallakaatitassianut aningaasalersuisarnerup iluaniipput radiukkut tv-kkulluunniit aallakaatitassianut, tassunga ilaallutik tekst-tv-mi imaluunniit internetikkut elektroniskiusumilluunniit periarfissat allat atorlugit takutitanut toqqaannartumik toqqaannanngitsumilluunniit tapiissutit suulluunniit, inuup ingerlatsiviulluunniit aallakaatitsinermik aallakaatitassionermilluunniit ingerlataqartuunngitsup, atermi, ilisarnaatimi (logo), kinaassutsimi, ingerlatami nioqutissiamiluunniit ilisimaneqarnerulernissaat siunertaralugu aningaasaliiffigisai.

Imm. 2. Aallakaatitap aningaasalersugaanera aallakaatitap aallartinnerani, naanerani aallakaatitalluunniit nalinginnaasumik unillatsiarfiini, imaluunniit taaneqartut arlaanni arlalinni, tapiissuteqartup aqqata ilisarnaataaluunniit (logo) nalunaarneqarneratigut ilisarnarsisinneqarsinnaasariaqarpoq. Tamakkuali aallakaatitami namminerimi ilanngunneqassanngillat. Taamaattorli tekst-tv-mi takutitani ataasiakkaani, imm. 1 naapertorlugu tapiiffigineqartuni, tapiissuteqartup aqqa ilisarnaataaluunniit (logo) nalunaarneqassapput.

Imm. 3. Aallakaatitap aningaasalersorneqartup imarisaa qanorlu saqqummiunneqarnera tapiissuteqartumit imatut sunniuteqarfigineqassanngilaq, radioqarfiup tv-qarfiulluunniit aallakaatitanut tunngatillugu aqqqissuinermini nammineersinnaaneranut malunniutissalluni.

Imm. 4. Aallakaatitassiat inuup ingerlatsiviulluunniit immiaaqqanik, viinninik imigassanillu kimittuunik, tupanit nioqutissianik, nakorsaatinik nioqutissanilluunniit pujortarnermut atatillugu atorneqarnerusartunik pingaarnertut ingerlataqartup aningaasalersugai aallakaatinneqaqqusaanngillat, taamaattorli tak. Imm. 8.

Imm. 5. Aallakaatitassiat upperisarsioqatigiinnit aamma politikkikkut partiinit, kattusseqatigiinnit, kisimiillutik qinigassanngortittunit taakkuluunniit suleqatigiiffiinit aningaasalersorneqartut aallakaatinneqaqqusaanngillat, taamaattorli tak. imm. 7 aamma 8.

Imm. 6. Aallakaatitassiat nutaarsiassanik maannarpiarlu soqutiginartunik imallit aningaasalersorneqaqqusaanngillat.

Imm. 7. Radioqarfiit tv-qarfiillu tapiissutinik pissarsineq ajortut imm. 5-imi pineqanngillat.

Imm. 8. Naalakkersuisut imm. 4-mi 5-imilu inerteqqutit avaqqunneqarsinnaaneri pillugit maleruagassiorsinnaapput.



nutaarsiassanik, maannarpiarlu soqutigintunik imallit naliginnaasumik inuiaqatigiinni ilisimasanut paasititsiniaanermullu iluaqutigisinnaasatsinnik aallakaatitsisarnissaq periarfissaalertillugu,. Ataatsikkullu tusagassiuutit tatiginassusaat innarlerneqannginnissaat anguniarlugu, aallakaatitassianik nutaarsiassanik, maannarpiarlu soqutigintunik imallit aningaasalersorneqarsimanersut ammasumik nalunaarutigineqartassaaq.

Demokraatit neriutugaat Naalakkersuisunit, Inatsisartunilu partiinit allanik manna siunnersuut amerlasuunit tapersorsorneqarluassasoq.

Pisortanut aningaasaqarnikkut allaffissornikkullu kingunerisassai

Allannguutissatut siunnersuusiornissamat aningaasartuutitaqassaaq, taassumallu iluani aamma tusarniaanermut. Inatsimmi atuuttumi allannguutaasusaaq annikimmat aningaasartuutissat AC-årsværkimit 1/2-imit annerunissaat naatsorsuutigineqanngilaq.

§37 apeqqummut akisummi 49/2020 erserpoq KNR-p nalilersimagaa innuttaasunut kiffartuussinissamat pisussaaffiit allat aningaasaqarnikkut, inatsiseqarnikkut allaffissornikkullu kinguneqassanngitsut. Taasumallu saniatigut akisummi erserpoq KNR maleruagassat malillugit tusagassiortutut angalanernut, soorlu Qeqertarsuup eqqaanut rubinisorfimmu Pituffimmulluunniit peqataasoqarsinnaanngitsoq.³

Inuussutissarsiornermut aningaasaqarnikkut allaffissornikkullu kingunerisassai

Soqanngilaq

Innuttaasunut aningaasaqarnikkut allaffissornikkullu kingunerisassai

Soqanngilaq.

³ § 37 tunngavigalugu apeqqummut akissut normu 49/2020